

# Männer!

Omm letzde Somsdaachmiddaach habb ich die Paula uff de Gass getroffe. Ei gude, Paula, habb ich gesaat, wie gieht derrs unn was machden moin Kumpel Karl?

Heer merr uff mett dem, hottse ze Antwort gewwe, der sitzt schunn zwaa Stunn uff de Terrass, redd koon oone unn guckt nor in die Luft. Unn alles weeche dem Regal.

Weeche was ferrm Regal?, habb ich gefroocht.

Doo sächtse: Unsern Enkel hott von uns e Regal zum Selbst-Zesommebau geschenkt kriecht, dess hatt er sich gewünscht, ferr soi Ceedees unn so Sache. Unn heit moin, weil aach die Junge erst heit owend außem Urlaub zurick kumme, hott de Karl sich die Zeit genumme unn wollt dess Regal zesommeschrauwe. Dess war im Kinnerzimmer in de Wohnung von unserne junge Leit im ersde Stock, awwer nooch ooner halwe Stunn habb ich bis in moi Kich erunner den alde Breweler schenne heern, unn als ich enuff bin, um emol nooch emm ze gucke, doo habb ich geseh, warum de Karl so e Wut hatt: Dess Regal war winsch unn iss alls umgefalle. Unn de Karl hott gekrische: Ich bin zu bleed, um so e Regal uffzebaue. Unn dann hotters widder ausenonnergebaut, hott alle Bretter unn alle Schrauwe schee newernonner uff de Boddem geleecht unn iss enunner uff die Terrass, doo sitzder jetz noch.

Ich fahr mol hie, habb ich gesaat, unn guckt nooch dem Kerl.

Awwer wart bis ich dehoom bin, hott die Paula gesaat, de Karl, wanner Wut hott, mächder die Dier nit uff, innere Verrdelstunn bin ich dehoom.

E halb Stunn später hott merr die Paula die Dier uffgemacht, ich bin gleich uff die Terrass, habb Gude gesaat unn habb mich newern Karl gesetzt.

Was willsden du?, hott der mich oogegauzt, hotters die Paula erzählt von dem Regal? Unn dass ich zu bleed bin ferr so e oofach Ding zesommezebaue? Ach Honnes, mir Alde gucke alls uff die Ooleidung unn hawwe koo Fantasie mehr, dess ohne so e Stick Babier hiezekrieh. Dess merk ich aach hier: Ich guck schunn alls dene weiße Wolke doo owwe nooch. Als Kinner hawwe merr in dene alles Meechliche geseh, awwer jetz seh ich nor Wolke.

Jetz loss emol, habb ich gesaat, auf, mir versuche jetz dess Regal ferdisch ze mache.

Was soll ich saache? Aach bei mir war dess Regal winsch unn iss nit steh gebliwwe. Doch mir iss e Idee kumme. Gebb merr mol doi Telefon, habb ich zum Karl gesaat, mir rufe in dere Firma mol oo.

Unn tatsächlich hott sich erausgestellt, dass die grad bei dere Sort Regal e falsch Ooleidung oigepackt hadde, mir sollte uns nit droo halle unn solles selbst versuche, dann wärs gonz leicht. Unn tatsächlich, mir hawwe unsern Herrnkasde oogestrengt unn hawwe dann dess Regal richdisch schee hiekriecht.

Dann hawwe mir zwaa uff de Terrass gesotze, hawwe Kaffee gedrunke unn hawwe de weiße Wolke noochgeguckt.

Die doo, sächt de Karl, dess iss e Glück, die uff de Eier sitzt unn ihm Schnawwel hochhebt, unn guck, hinner ihr iss schunn e Kücke.

Dess iss doch koo Glück, habb ich gesaat, dess iss e Dippe, de Domp hott de Deckel so halb uffgedrickt unn dess dehinner, dess iss e Suppetass.

Die Paula hott hinner uns gestonne unn hott de Kopp geschittelt. Männer!, hottse gesaat, Männer! So alt wie se sinn, die sinn unn bleiwe Kindsköpp.

Eiern Honnes